



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 3

Yangia anidakangma :



Tir Yimym



tiryimym@aolima



tir yimym

TAPAK 10

Assam nung lockdown
malitsü: Health Minister

Zverev nem 'German Sportsman Of
The Year' naroküm agütsü



VOL. XIX NO. 75 (ADOK 75)

DIMAPUR

RASEMNÜ (WEDNESDAY)

LUCHII

(DECEMBER) 22, 2021

₹ 5.00

Nagaland sorkari district tasen 3 nung DC shimogo

Dimapur, December 21, 2021 (TYO): Nagaland chief secretary J Alam-i district tasen asem-Tseminyu, Chumoukedima, aser Niuland nung Deputy Commissioner inyaktüpurtem shimogo.

State sorkari Tseminyu nung Deputy Commissioner inyaktü atema Additional Secretary, Home Dr. Zasekouli Chusi, IAS nem mapa lemkütsü.

Maneni, Chumoukedima nung Deputy Commissioner inyaktü atema ADC Pungro

Abhinav Shivam, IAS aser Niuland Deputy Commissioner inyaktü atema ADC, Tuensang Ajit Kumar Verma, IAS na shimogo.

Kohima district nungi Tseminyu sub-division aser Dimapur district nungi Niuland o Chumukedima sub-division tem district jenjang nung ajungket.

Nagaland nung kin 11 nungi district tasentem kümtettsü takhangbatem liasü saka state Cabinet-i district asem dang kümtettsü teletetba agi.

COVID-19 Nagaland: Puteter mesüra taneptsü angur maliasü

Kohima, December 21, 2021 (TYO): Nagaland nung Mongulbarnü COVID-19 aliba puteter mesüra taneptsü angur ka danga maliasü.

Tang nisung 83 anepaludar saka parnok 69 dakbo shirangba yimya kecha mali, ta State Nodal Officer Dr Nyanthung Kikon-i ashi.

"Hombar tashi nung nisung 758,487 nem COVID-19 vaccine indang dose 13,31,447 agütsüogo" ta State Immunization Officer Dr Ritu Thurr-ia ashi.

Vaccine agirtemji frontline workers 60,985, healthcare workers 16,005, arishi küm 45 ser temapur 213,866 aser arishi küm 18 nungi 44 tsüingda alir 467,631 lir, ta paisa ashi.

"Vaccine agirtem rongnungi nisung 572,960-i dose anaprong agiogo. Parnokji frontline workers 48,605, healthcare workers 13,540, arishi küm 45 ser temapur 178,300 aser arishi küm 18 nungi 44 tsüingda alir 332,515 lir" ta Dr Thurr-isa metetdaksü.

Assam & Arunachal tsüingda 'border realignment' asütsü akok

New Delhi, December 21, 2021 (Agencies): Union home minister Amit Shah-i Mongulbarnü New Delhi nung Assam chief minister Himanta Biswa Sarma aser Arunachal Pradesh chief minister Pema Khandu na den ajurutep.

Assam aser Arunachal Pradesh tsüingda arrtsü mangatettep indang jembitsü atema Amit Shah-i CM ana den ajurutep.

"Onoki tongti süa jembibaji state ana tsüingda 'border realignment' liasü" ta Assam CM Sarma-i senden amenba sülen osangbener dang ashi.

"Union Home Minister-i ni aser Arunachal Pradesh CM Pema Khandu na den ajurutepbaji state ana tsüingda

border realignment aser alignment atema liasü" ta pai ashi.

Sangküm January ita state ana tsüingda senden amentsü ta paisa shisem.

"State ana tsüingda arrtsü ken o tebenja ya sorkar jenjang nung olemtepbä ajanga dang koktettsü" ta taoba mapang Arunachal Pradesh CM Pema Khandu-i shiogo.

Lok Sabha nung Centre-ia Northeast nung state pezüi Assam den arrtsü mangatettep lir ta metetdaksüogo.

Arunachal Pradesh, Nagaland, Meghalaya aser Mizoram state temi Assam den mangatettep adoka lir ta Centre-i ashi.

Karnataka Congress MLA-i Anti-Conversion Bill shisaa endok

Bengaluru, December 21, 2021 (Agencies): Karnataka assembly nung Anti-Conversion bill benokba atema ashishitep ken o ka adokogo aser Mongulbarnü assembly nung obang meputepi raratepdang Congress MLA DK Sivakumar-i bill shisaa endok.

Mongulbarnü iba bill benoktsüba osang kecha maliasü aser BJP-i opposition nem osang kecha mesangoktsüi bill benokbaji ozüingü memelar ta Congress-i ashi.

Cabinet-i Anti-Conversion bill indang draft agizükba sülen

anogo ka dang lir tanü supplementary agenda nung shilem ka assembly nung ama bill ji benok.

Home Minister Araga Jnanendra-i bill benokba sülen opposition aser ruling BJP tsüingda kanga mejungi raratep.

Iba inyakyim ya Constitution nung Article 25 alema lir ta leader of the opposition Siddaramaiah-i ashi.

India kübok BJP-i sorkar yimsü asüba state temi yangluba mesüka Karnataka nunga Anti-Conversion bill yanglu.

Dec 23 nü bank tem sodi anogo asütsü

Dimapur, December 21 (TYO): Nagaland state sorkari December 23, 2021 nü Banks aser Financial Institutions sodi anogo asütsü ta osang

metetdaksüogo.

State sorkari Negotiable Instruments Act, 1881 (Act XXVI) kübok sodi anogo agütsür.

District 3 kümtetba sülen Dimapur telongtet melenshir



Dimapur, December 21, 2021

(TYO): Nagaland Governor Prof Jagdish Mukhi-i Tseminyu, Chumoukedima aser Niuland district tasentem indang telongtet osang metetdaksüogo.

"Tseminyu district indang telongtetji tang Kohima district kübok aliba Tseminyu Sub-division asütsü" ta Home Department General Administration Branch-I ajanga sangdong ka nung metetdaksü.

Maneni, Niuland district indang telongtetji Dimapur District kübok tang aliba Niuland Sub-division asütsü, ta parnokisa ashi.

Chumoukedima district indang headquarters ji Chumoukedima asütsü aser iba

metetdaksü.

Chumoukedima district telongtet nung Seithekema EAC Circle nungi densemba yim/jilatem.

1. Aoyim, 2. Bade, 3. Chekiye, 4. Chumoukedima 'A', 5. Chumoukedima 'Town', 6. Chumoukedima village, 7. Diezephe, 8. Diphupar 'B', 9. Diphupar village, 10. Ikishe, 11. Khopanal, 12. Khriezephe, 13. Kirha, 14. Murise, 15. Naga United, 16. Seitheke 'A', 17. Seitheke 'B' New, 18. Seitheke 'C', 19. Seitheke Old, 20. Seluophe, 21. Shokhuvi, 22. Singrija, 23. Sodzulhou, 24. Sovima, 25. Tenyiphe-I, 26. Tenyiphe-II, 27. Thilixu, 28. Toulazouma, 29. Tsithrongse, 30. Unity, 31. Urra, 32.

Vidima, 33. Virazouma, 34. 5th Mile Model, 35. 7th Mile Model, 36. 7th Mile Village, 37. Tir.

"Chumoukedima district tasen akümba aser Niuland Sub-division district jenjang nung ajungketba sülen Dimapur district telongtet melenshir. Dimapur district telongtet nung tang aliba Dimapur Sadar Area aser taoba mapang Seithekema EAC Circle kübok adenba jila aser yimtsüing kar adentsü" ta Home Department-isa ashi.

Dimapur District telongtet melenshiba nung Seithekema EAC Circle nungi densemba yim/jilatem.

1. Aoyimti, 2. Bamunpukhri A, 3. Bamunpukhri B, 4. Darogajan, 5. Darogapathar, 6. Doshehe, 7. Dubagaon, 8. East Dimapur Town, 9. Ekhyoyan (erstwhile Domokhia), 10. Ekranipathar, 11. Eralibil, 12. Khusiabil, 13. L. Hotovi, 14. Padumpukhri, 15. Purana Bazar B, 16. Samaguri, 17. Shozukhu, 18. Toluvi, 19. Zani.

Nagaland nung district 15 ji Tuensang, Kohima, Mokokchung, Mon, Zunheboto, Wokha, Phek, Dimapur, Peren, Kiphire, Longleng, Noklak, Tseminyu, Niuland aser Chumoukedima lir.

NPCC President-i Assembly bangzüng aitsür

Dimapur, December 21, 2021

(TYO): Nübertemi tai nangzüksüba masü saka temeten meshir ajisüaka December 20, 2021 nü Nagaland State Assembly (NLA)-i teletetba agiba ajanga tasür kibongtem, yimten aser Nagaland nung alirtem mezüingmeshiogo ta NPCC President K. Therie-i ashi.

Nisung telok tepsetba sülen tatok meshiba magizüker. Tepsettsü aser tatok meshitsü ta inyaka maotsüla. Nagaland

Chief Minister aser Home Minister nati nübertem dang langzütsüla. Tenati meteta 21 paramilitary sepaitem ya aru asü memeteti aru'ar tenati osang tejangja ashitsüla. Tenati memeti aruba süra sepaitem anema ken o benoktsüla, ta pai metetdaksü.

Nübertemi temeten akhanger aser asenoki ozüing nung aliba ama aibelenertem merenshidaksünür. Aibelenertem merenshitsü melena NLA-i parnok nem tatok meshidaksür jenbudaksünür, ta K Therie-isa ashi.

"December 20, 2021 nü NLA-i bangzüngtepbä ajanga Nagaland State sorkari memeteti army-i mapa inyakba ama sayur. Anungji ibaji shitak süra army-i Constitution alema inyakogo aser meimchir anema mapa tamajung inyakogo. Constitution nung tanga state ka nungi army-i arur tai maketba nisungtem mashimashii tepsettsü tashi agüja mali. Congress nem maongka agütsür onoki temeten bentsür arutsü" ta paisa metetdaksü.

West Bengal sorkari district ajak nung Christmas amongtsü

Kolkata, December 21, 2021

(Agencies): West Bengal sorkari district ajak nung aser talisa tenla ki tejentem aliba tesemtem nung Christmas amongtsü ta chief minister Mamata Banerjee-i metetdaksüogo.

"Tang tashi nung ozü sorkari Kolkata nung dang Christmas monga arur. Ajisüaka onoki iba benjung tesem ajaklen amongtsü lemtetogo. Cooch Behar nungi Jhargram tashi district ajak nung

police commissariat temi Christmas benjung ayonga amongtsü metetdaksür. Iba benjung ya talisa tenla ki tejentem aliba tesemtem nung amongtsüla" ta Mamata-i ashi.

Hombar nikongdang South Kolkata kübok Park Street nung aliba Allen Park nung Christmas carnival lapoktsüdang West Bengal Chief Minister-isa iba osang metetdaksü.

Ajisüaka, Opposition party temibo Trinamool Congress (TMC)-i Christmas amongtsü osang sangoktsüba ya sangküm Goa assembly elections nung rangloker inyaker ta metetdaksüogo.

West Bengal nung Christian nütsüing yongsük ishika dang lir. 2011 census ajanga state nütsüing yongsük nungi Christian purtem 0.72% dang lir ta ashir. Census ajanga Hindu nunger 70.54% aser

Muslim nunger 27.01% lir.

"Onoki ajungalen Christmas amongtsü, Vatican nungi Goa aser Goa nungi Kolkata tashi nung amongtsü. Ni tawa tu Goa indang Archbishop den jembi aser idangji asen St Xavier's college indang shiogo" ta yashi Mamata-i ashi.

"Asenok longjemtsüla. Asenoki telok, kin aser tamangba yimsü ajak meimtsüla. Asenok longjem nung dang asen linük tashi aittsü" ta laisa ashi.

2019 Lok Sabha election matongdang Mamata Banerjee-i tekülem ki, tenla ki aser mosque tem sorkari kümzüka ayutsü aser yanglushitsü nangzüka liasü.

CMC Vellore nung Naga nunger ki yanglutsü jembitep



Dimapur nung Sangtännü (Mongolbar nü) CMC Vellore nung Naga nungertem teyari tajungba angutsü atema nungdak inyaka aotsü shisalemsatepba sentong nung, CMC Vellore nung cancer tashidak anepertem rongnung, Dr.Aomangyang-i pa anepba taküm kuli ashiba noksa nung angur.(December, 21, 2021)

Dimapur, December 21 (TYO) : Christian Medical College, Vellore nung Nagaland nungi taneptsü bushia aoertem atema tanendak ki ka tekaratiba nung yanglutsü atema tanü sangtännü (Mongolbar) Dimapur nung Nagaland Baptist Church Council, Nagaland Mission Movement aser arogo lenirtem kar sendena shisalemsatepba senden ka liogo.

Iba telongjem sentong ya CMC Vellore nung Chaplain Wb.Lipoktemshi Jamir lenisüba nung ayongzükba liasü. Pai ashiba agi, tang CMC Vellore

nung Naga nunger taneptsü bushia arurtem asoshi rongdak nungdak tulutibaji tanendak ki ka alitsüba li. "Asen kidanger state-tem Assam, Manipur, Meghalaya aser Miroram nungertembo pei pei government aser arogo tem telongjem taneptsü bushia Vellore-i arurtem anendak ki tulu yanglua lir aser mozü kidang nübertem nungdak nung yariteptsü asoshi nisungtema teperi yua lir, saka asenokbo akhidang küm metsü jakdang, Rev.Dr.Noksangchila aliba mapang, lai anepalua temulungertem nungi tenla

bendener ali tilaka alia toktsüba dak alaka, shingai kecha inyaka mali," ta metetdaksü.

CMC Vellore ya akhidang tetsür ka kijai lapokba küm 119 tain mozü ki ka lir. Mezüngbo ibai dispensary ka dang liasü aser Medical college lapokdanga tetsür atema dang liasü, anungji 1947 küm nungiang teburtema medical azüngtsü agizük aser tangbo ibai linük nung medical college aser mozü ki tulutem aser tajungtem rongnung ka kümogo ta Chaplain Lipokisa ashi.

Tang CMC nung ya anogo shia Out patient nisung 9950 aser Inpatient shirangertem 2320 repranger. Iba mozü kidang doctor 1924 aser nurse ajak agi 3206 lir. Dimapur nung akaba CIHSR (Referral Hospital) yaa CMC teyari agia lapokba lir.

Tanü iba sentong nung CMC nung taneptsü angur aser kinungertem taküm kuli lemsatepba mapang liasü.

Iba telongjem senden nung adenertem rongnung nisung kar shimtetter, NBCC lenirtem ajurua tekaratiba nung Vellore nung ali ano tuluba ka bushia Naga nunger anisüngzükdak ki yanglutsü atema ajungshiteptsü lemtetogo.

KOHD nung jeli Khristmas benjong amung



Mongulbarnü jeni Khristmas benjong amungba mapang tangokba noksa ka nung Kohima Orphanage and Destitute Home (KOHD) tanurtem aser dangartem angur.

Kohima, Luchii/Dec. 21 (TYO): Tang benjong mapang temeim lemsateptsü mechi Kohima Orphanage and Destitute Home (KOHD) nung jeli Khristmas sentong ka Mongulbarnü agia liasü aser iba sentong ya His Little Ones (HLO), USA ajanga sponsor süa liasü.

Iba sentong nung His Little Ones (HLO) indang Founder aser Chairman, Dr Andrei Dutai KOHD staff aser tanurtem den salem lemsatep aser item tanurtem ya meimtsüla aser parnoka tia ka lir, ta shia liasü.

Baylor University, US nung Ph.D Scholar, Husezo Rhakho-i o jembia liasü aser pai Yisu Khrista-i sayatenya inyakba jembia. Pai tanurtem dang Tsüngrem dak amangtsü

ajungshi aser Tsüngremi parnok tejangraba ataloktsütsü, ta ashi. KODH nung aliba tanurtem aser Mülüzölü Nyekha nungeri iba sentong nung temeja ken aten aser Brandon Quarles, Professor, Baylor Law School ajanga KOHD atema sarasademja liasü, kong America aser Europe nungi iba sentong nung Zoom ajanga dena liasü.

Kasa anogo nung KODH nung aliba tanur pezü asoba anogo munga liasü.

Romania nung aliba tanurtem tia tajungba kumdaksütsü nükjidong nung His Little Ones ya Dr Andrei Dutai anir 2001 küm tenzüka liasü aser parnok indang nükjidong ya tanurtem nem tanüla, shisatsü aser temang nung teyari agütsütsü lir.

His Little Ones yagi

Bucharest nung aliba orphanage asem nung tanurtem nem anogoshi takum nung nungdakbatem tajungtiba agütsütsü meranger.

Tanurtem dang temeim sayur, osang tajung sayur aser yamaji alir, ta sangdong ka ajanga ashi.

His Little Ones ya tajangzük mebushiba tentet ka lir, koba teyari aser education kisüing atema tentet aser ajakji Romania nung tsürabur maliba tanurtem asoshi tentetba alitsü.

Bucharest, Romania nung tsürabur maliba tanurtem anepaluba tesem asem lir. Mezüngbuba ya arishi küm asem tashi atema lir, tanabuba ya tetsür arishi küm asem nungi 18 tashi atema lir aser ano ka co-ed orphanage lir, kong tanur arishi küm 3 aser 18 tsüngta anepalur.

NDPP ajanga Christmas salem lemsatep

Dimapur, Luchii/Dec. 21 (TYO): Asenoki asen Kibuba aser Kumzüksang Yisu Khrista asoba benongtsü asen molung renemshiba mapang, Nationalist Democratic Progressive Party (NDPP) ajanga Nagaland nung aliba nüburtem dangi Christmas salem bener arur, ta NDPP sangdong ka ajanga ashi.

Asen molungsentsü agi magizükteti December 4, 2021 nü atalokba mamateti aliba

mapang ka nung asenok ajaki temeim, tepela aser yimjung nung ranglokti aser Khrista den lungjemti, ta ayongzük.

Iba temoatsü mapang ya amshia aseni TSüngrem dak amangba, meimchir dak tamang katetba aser nüburtem lungjemba tali tashi itshitsü mapang ka südaksüti, ta ashi.

Kasa mapang NDPP ajanga December 20, 2021 nü Nagaland Legislative Assembly indang

senden 13 buba nung pangzüing agizükba pelashishia agizük aser maneni UDA sorkar dang iba pangzüing ya amer nüburtemi aginüba ama tekeratiba nung Armed Forces Special Powers Act, 1958 agientsü asoshi inyaktü ajungshir, ta sangdong ajanga ashi.

Ajak den temoatsü aliba Christmas aser teimla aliba Küm Tasen benjong salem lemsatep, ta NDPP sangdong ajanga ashi.

Indoor State Stadium nung gari anena ayuba tah metetdaksür

Dimapur, Luchii/Dec. 21 (TYO): Indoor State Stadium nung gari anena ayuba dak sendakba nung ita shia tah ya sen 500 aliba nungi sen 1000 akumer, ta Department of Youth

Resources & Sports ajanga sangdong ka nung metetdaksü. Iba totuyuba ya January 1, 2022 nungi tenzüka mapa kuma amshitsü, ta sangdong ajanga ashi.

Clean election onük nung züluba kaket ka sayaogo



Rev. Dr. Noklen Longkumer-i YSS Vol. 4 "Clean election" kaket sayatsüdang tangokba noksa nung angur. Mokokchung, 21st December, 2021

Mokokchung, 21 Dec (TYO): Naga lima tangar menepa kümdaksünüra election merüka agitsü tim ta angateta alimai kanga dang nungdaka aliba "Clean Election" ta sür Ao oshi nung züluba kaket ka 20th Dec nü Rev. Dr. Noklen Longkumer-i Ungma Laishir Senden telungjem Ungma yindak akadang sayatsüogo.

Iba kaket ya Aor takutet Advocate, Professor, Activist, Laishir putishir, Arogo nung tenzükertemi ocet tajung aika Clean Election dak sentakba temelenshitsü indang shia angutsü. Clean election dak sentakba onüktem Yanglushidi Sensaksem Sabang (YSS) sabang nung kanga dang aroka shisadanger, Nagaland state nung election merüka agitettsü atema state sorkar, mungdang, lokti tentet balala aser nütsüng shia teinyaktsü tetuyubatem iba kaket nung shia angutsü, ta osang ka ajanga metetdaksü.

Iba kaket ajanga NBCC aser ABAM Clean Election yimyim aser maparen balala nung teyari

angutsü imlar. Iba kaket nung lenirtemi tuyuba ama nüburtemi inyaktet nungbo Nagaland ya adangji Tsüngremi shimtetba lima ka ta alima dang kuli sütettsü, ta osang ajangasa shisem.

Iba kaket tebhong küma adoktetba ya Rev. Dr. Wati Longchar (Waromung) lenisüba nung, Rev. Dr. Noklen Longkumer (Ungma), Rev. L. Lima Jamir (DABA), Shilula Imchen (MTBA) parnoki tongti shilem agiba asoshi parnok nem tenüngsang agütsür, ta metetdaksü.

Iba kaket ya Ungma Baptist Arogo (UBA) aser Program for Theology and Cultures (PTCA) na lungjemer adoktsür. Iba kaket ya YSS Vol. 4 buba adok alitsü. Taginertemi item number nung tongteprateptsü metetdaksür: Kohima area (9856587377), Mokokchung area (9436733883, 8787550893, 7005761441), Dimapur area (8132037717; 8131865765; 7005501457; Impur area (7005527600) aser Tuli area (9612313753).

Nagaland nung yimtsüngtem survey agiba sayaogo



Dimapur, Luchii/Dec. 21 (TYO): 2021 küm Nagaland nung yimtsüngtem aliba indang survey ka Directorate of Economics & Statistics, Government of Nagaland ajanga agir adokba kaket December 21, 2021 nü Sentianger Imchen, IAS, ACS & Finance Commissioner, Nagaland ajanga Secretariat, Kohima nung pa office nung sayaa liasü.

Iba survey ya Directorate of Economics & Statistics ajanga agiba liasü aser state nung aliba yimtsüng ajanga aser nisung

aliba tesem ajunga awajema liasü.

Department balala nung yimtsüngtem shidak mamshiba mesüra balala amshiba asoshi survey ka nungdak ta ajiteta, iba mapang Additional Chief Secretary aser Development Commissioner inyaka alisang, Sentianger Imchen-i iba survey ya agitsü sentong yanglua liasü.

Nagaland nung March 1, 2021 tashinung recognise süa aliba yimtsüng 1280, recognise mesüi aliba yimtsüng 75 aser hamlets 111 liasü, ta iba survey ya ajanga ashi.

Assam-Nagaland arrtsülen ali atsünga agir nisung 3000 meindok



Karbi Anglong district administration aser autonomous council-i Hombarnü Assam-Nagaland arrtsü anasa ali atsünga alirtem meindokba mapang tanokba noksa nung angur.

Diphu, December 21, 2021 (Agencies): Karbi Anglong district administration aser autonomous council-i Hombarnü Assam-Nagaland arrtsü anasa ali atsünga agir nisung 3,000 shi meindokogo. "Kibong 107-i ali atsünga agi ta Karbi Anglong Autonomous Council (KAAC)-i jangjatet aser parnok timtem kecha melii meindokogo" ta district Superintendent of Police Pushpdhar Singh-i ashi. Bokajan sub-division kübok Lahorijan block nung ozüing

alema alir nisung 3,000 aotsü atema taoba mapang KAAC-i tetuyuba agüja liasü. Parnok nisung 2,000 shi kati ki bensar iba tesem toktsür ao aser tangartemi ali toktsütsü molunga agizük, ta Pushpdhar Singh-i ashi. India nung Autonomous council temi land & land revenue onüktem atema mapa inyaksü tashi lir. Külen, district administration-ia tensa azüoka ayutsü atema CrPC Section 144 kübok tenokdangbatem

agüja liasü. Iba tesem nung ali atsünga agirtemji Muslim aser Nepali nunger teimba lir aser nisung kar Nagaland nungi lir, ta ketdangsür kati ashi. Darrang district administration-i Sipajhar tesem nung iba mesükba mapa ka inyakba sülen tang Karbi Anglong nung inyakogo. Darrang district kübok Dholpur Shiva Mandir anasa ali atsünga agirtem meindokdang nisung ana asü aser aika yirua liasü.

Northeast nung mezüngbuba 'tea museum' Dibrugarh nung lapoktsü

Dibrugarh, December 21, 2021 (Agencies): Northeast nung mezüngbuba "tea museum" Assam kübok Dibrugarh nung lapoktsü. Dibrugarh ya "tea city of India" ta züngshir. 2023 küm tetenzüklen Dibrugarh nung "tea museum" lapoktsü, ta Assam Tourism Development Corporation Limited (AITDC) chairman Rituparna Barua-i ashi. Iba mapatong nung mezüngbuba shilem 90% tashi renemogo ta Baruah-i ashi.

North East Council (NEC) aser Assam sorkari iba mapatong nung mezüngbuba shilem atema Rs 3.14 crore lemezükja liasü. Dibrugarh nung tea museum ka yanglutsüba ya 2016 küm Assam tourism department-i agizüka liasü aser 2017 nungi iba mapa tenzük. "NEC-i priority basis nung mapa shilem tanabuba atema Rs 40 crore agizükogo" ta Baruah-isa metetdaksü. Mapa tanabuba nung museum complex telung nung

auditorium ka, model tea garden ka aser tea factory ka yanglutsü. Iba indang kimung ya acre 2.66 lir. "Iba museum ajanga international aser domestic tourists atsür arutsü aser Assam indang tea industry talila ajungkettsü imlar. Tesemdangertemi süngo indang putiotsü metettsü. Upper Assam nungi süngo otsü tenzükba asenoki meteta lir aser iba ya British nuger tenzükba liasü" ta Baruah-isa ashi.

Animesh Bhuyan tepsetba atema charge-sheet benoktsü: Assam Police

Guwahati, December 21, 2021 (Agencies): Animesh Bhuyan tepsetertem anema charge-sheet takang benoktsü ta Assam Special Director General of Police GP Singh-i ashi. GP Singh-i Jorhat semdangdang iba ken o bushisüngdangba mapa shitak odar ta ashi. "Police-i tai tongloksürtem anema kuli peria dang ngutetogo. Police aser public nungi kulitem okadak shiogo. Onok ket nung CCTV footage aser phone tem lir" ta paisa metetdaksü. CCTV footage aser phone ajak forensic tests atema yokogo aser anogo 10-12 tsüngda bushisüngdangba maparen tembangtsü ta GP Singh-isa ashi. "January mezüng hopta tashi nung onoki charge-sheet benoktsü akok. Jorhat police dang temesepba mozütem

anema inyaksü tetuyuba agütsüogo" ta paisa shisem. November 29 nü Jorhat jila nung nisung telok kati All Assam Students' Union (AASU) tanishir ka zükset aser local journalist ka den lanur ka yirutsü. AASU tanishir Animesh Bhuyan aser journalist Mridusmanta Baruah na amakba video ji social media nung kanga prokshi.

GOVERNMENT OF NAGALAND

DIRECTORATE OF HEALTH & FAMILY WELFARE

NAGALAND: KOHIMA

No. DHFW-523/TRG-NSG/2017/ Dated, Kma the thDec'2021

NOTIFICATION

In Pursuance of this Directorate Advertisement No. DHFW-523/TRG-NSG/2017/7519-24/ Dated: Kohima th 22nd June'2021 and No. DHFW-523/TRG-NSG/2017/4442/ Dated: Kohima th 2nd August'2021 respectively, the list of selected Candidates (Merit wise) to undergo GNM & FHW Training for the Academic session 2021-2022 can be downloaded from the Department's Website www.nagahealth.nagaland.gov.in and DHFW Office Notice Board. Placements of seats and admission will be intimated later on.

(Dr. NEIKHRIELIE KHIMIAO)
Principal Director
Directorate of Health & Family Welfare
Nagaland : Kohima.

Issued by DIPR

TEPELA LEMSATEPER

01.05.1937-15.12.2021

Asür **TONGDANGIENLA** (Chuchuyimlang) asükhu anogo nung shirisa sarasadem, temeim mapa, nübu aser rongsen agi yaritepogo ajak dang iba osang ajanga kinungertemi kanga pelaba lemsateper. Nenok temeim aser mapa tajung onoki teti bilemtettsü.Tsüngrem tajungsangi nenok maneni moajang.
~ Temeim Kinungbu, Jalatem, Shemchirtem aser Anükapang.

Assam nung lockdown malitsü: Health Minister

Guwahati, December 21, 2021 (Agencies): Assam nung joko lockdown malitsü ta Health Minister Keshab Mahanta-i ashi. Assam-i COVID-19 indang Omicron variant anema raratsü renema lir aser state nung putetba sülen ang SOPs mesüra guidelines agütsütsü, ta Mahanta-i ashi. "Tang nungi Assam nung lockdowns malitsü saka kasa mapang asenoki virus den külemi liyonga aotsü" ta paisa ashi. Assam sorkari COVID-19 SOPs kecha magütsütsü aser COVID-19 tensa azüoka lir ta taoba mapang Chief Minister Himanta Biswa Sarma-i metetdaksüogo. "Assam nung tensa azüoka lir aser sorkari SOPs tasen kecha bilema mali" ta Chief Minister Sarma-i ashi.

Meghalaya Congress ya Khasi party lir: UDP

Shillong, December 21, 2021 (Agencies): Meghalaya nung Congress ya joko "Khasi Party" dang ka kümogo ta United Democratic Party indang general secretary Jemino Mawthoh-i ashi. "Meghalaya nung Congress züngsem teimba ka All India Trinamool Congress (AITC) nung denogo aser iba jagi Khasi Hills nung dang Congress lir" ta Mawthoh-isa ashi. "Congress-i tang parnok chichiba tanüla sayur" ta paisa shisem. UDP ya "Khasi only party" ka lir ta taoba mapang Congress-i jembiba atema UDP-i iba olen meyiptsüogo. Meghalaya nung tang yimtenren tensa ajanga 2023 elections nung onok ajangzüksü ta UDP lenniri ashi. Taoba Meghalaya Chief Minister, Mukul Sangma ajanga dang AITC-i Meghalaya aser Garo Hills nung amenoktet ta Mawthoh-isa metetdaksü.

NHM mapa inyakertemi lungkak aitba anenogo

Aizawl, December 21, 2021 (Agencies): Mizoram sorkari COVID-19 wara mapang lungkak aitba noktangba sülen National Health Mission Employees Union of Mizoram (NEUM)-i Hombar nungi lungkak aitba anenogo. NEUM kübok National Health Mission nung contractual employees-i December 17 nungi regularization takhangba agüja lungkak ait. State sorkari NHM staff pur regularisation asütsü mapa inyaksü ta health minister Dr. R. Lalthangliana-i nangzükba sülen Hombarnep 7:00 ako nungi mapang telatet makai lungkak aitba anenogo ta NEUM-i metetdaksü. NEUM-i akhangba onüktem atema Health secretary R. Lalramnghaka-i akokba tashi mapa inyaksü nangzük, ta parnokisa ashi. NEUM-isa lungkak aitba mapang nübortem aser talisa shirangertem nem tetsükdaksü agütsüba atema tatok meshiogo.

Manipur nung bendanglen nungi arur 3 dak COVID putet

Imphal, December 21, 2021 (Agencies): Manipur nung bendanglen nungi arur nisung asem dak COVID-19 putetba ajanga aoksateper. COVID-19 puteter nisung asem rongnungi ana The Netherlands nungi aser ka Canada nungi aruba liasü. Christmas benjung mapang Omicron variant azüoktsü atema The Netherlands nung Honibar nungi lockdown tenzükogo. Parnok asemprong ya Manipur kübok Imphal West district nung alirtem dang lir. Par asem ya Deobarnü Bir Tikendrajit International Airport nung arua anenzük. Parnok ajak Jawaharlal Nehru Institute of Medical Sciences (JNIMS) Hospital nung anioka lir.



TIR YIMYIM YIMOBILEM (EDITORIAL)

DIMAPUR RASEMNÜ, LUCHII(DECEMBER) 22, 2021

Shingaia maginüba ozüing

Nagaland nung Armed Forces Special Powers Act (AFSPA), 1958 ya shingaia maginüba ozüing ka kumogo. Atangji, iba ozüing anema mapang mapang shia Naga Peoples' Movement for Human Rights (NPMHR) aser Naga Students' Federation (NSF) nungertemi ola adoka aruogo. Ajisüaka, iba ola jagi majet tang tashi Nagaland ajaklen iba AFSPA ozüing amshia India nung sepaitemi Naga nung taküm aser rongsen mapayui samatsüba anogotem aiben ajurua arudagi. Tang tesüsa India sepaitemi, iba ozüing amshia Naga nungertem dak tauchi maka beshiba mapaji Oting nung atalokba mapa ya asütsü. Atangji, iba ozüing ya tema nung alir nübortem anema inyaksü latetba masü saka telong nung alirtem remoka samatsütsü asoshi yangluba ozüing ka lir. Ajisüaka, sepai kati mashi nisung ka dak temulung melemi bilemba kija agi khasettsü tashi agüja alinungji, iba tashiji amshia sepaitemi nübortem tsübudakja mashimashi inyaker. Iba ama ozüingjibo tanga aser tesüa nübortemi metizüktettsü. Iba AFSPA ozüing ya tesem ka nung amshitsü atema India government-i khen nung mapang talangka atema agütsür masü saka ita trokrok atsülander. Aji oda, tang Nagaland nung AFSPA ozüing amshitsü sepaitem nem ita trok asoshi tashi agüja aliba mapang ya, tan December 2021 nung temadoktsü, kechiyong India government kubok Ministry of Home Affairs-i taküm 2021 küm June 30 nü iba ozüing ya ano taruba ita trok Nagaland ajaklen alitsü ta sangdonga lir. Iba AFSPA ozüing küm shia ita trokrok atsünglanga arudang, aiben lokti tentetemi mepelaba metetdakja aruogo, ajisüaka state government tebilembabo memeteti liasü. Ajisüaka, yakanü tatar senden nung iba ozüing anema pangzüng renemba senden nung, tatartemi mapang shia iba ozüing ya ita trok atema atsülangtsü atema center government-i state government tebilemba asüngdang shia, state government-ibo iba ozüing ya atsülangtsü memulungi liasü ta jangjaago. Sepaitem nem AFSPA ama ozüing agi, temulung melemi bilemba kija kuli agi nisung khasettsü ozüing agütsüba nükjidongji, ozüing raksartem ket nungi government kumzüka ayutsü atema lir, anungji state government-i ashijabi center governmenti angatsüla. AFSPA ozüing atsülangtsü atema center government-i Home Affairs Ministry ajanga, " iba state mesüra tesem ya tensa mapang mejungi lendong tia ka nung lir, anungji government mapa shitak inyaka aotsü atema, AFSPA, 1958 (No.28 of 1958) ozüing section 3 nung tashi agüja aliba ama, Nagaland ajanga nung tensa majunga(Disturbed area) ta taruba ita trok züngshitsü," ta metetdaksür. Tang tesüsaba sangdongba nung, ita trokji tan December 31 nü tembangtsü. Iba ita anogoji kodang sükdangdir, tang Nagaland tatar senden mena "Nagaland ajaklen nungi AFSPA ozüing ya tangsa agientsüla," ta pangzüngsa latetbaji mapang shitak ka nung Naga nung tematiba yimten sabang nung latetba yimten ken o ka asütsü. Iba pangzüng yabo center government-ia angatsü imlar. Aji oda, state government kati tatar senden nung ajaki mulunga latetba pangzüng ka, center government-i manga nungbo, Nagaland nung ya India telongjem kubok aliba state government ya mali kümer, Naga nunger ajak ano khen longjemshir yimten nüchiso atema nokdaksüsa akümtsü. Atangji, Naga yimten nüchiso bushiba ya, tang atalokba ama Naga nunger dak mataloktsü atema , India government ozüing kubok masü saka Naga nungertema Naga nung temzüng ozüing kubok sademsadema linüba agi Independent bushiba liasü. Ibaji asenoki tangang tali tejangjaba angatettsü. AFSPA ya Nagaland nung tila nungi shir tuluba tashi agi shingaia maginer. Aji oda, ajak atema otsüsütsüsa Nagaland tatar senden nung dena center-i latetba AFSPA ozüing ya Northeast aser talisa Nagaland nungi agientsüla ta latettsüsa akümba yimten tensa tiaji bilemdangra, asenok nüchiso makaba alar telok lir ta angateter. Aji oda, asenok ya asen linütsü alir masü saka India government kubok talenba tia nung lir ta tangang kanga jangjaa metetter. Ano, talisa Nagaland nung tangbo Naga yimten nüchiso bushir teloktem den India government yimjung nung lir, anungji government anüksü aser telongpur nokdangtsü atema AFSPA ama ozüing tesashi amshitsü kecha menüngdaker. Külen Naga nung yimten nüchiso bushir teloktem den yimjung mapang küm kaka atsünglanger aser ano külen, parnok anema inyaksü asoshi AFSPA ozüing ya ita trokrok atsülander ta, yimjung mapang atsülangba o AFSPA mapang atsülangba na ya tangatetba nung kenyonji meputeptetter. Ibaji putepdakja, center government-i Nagaland nungi AFSPA ya December 31, 2021 anogo nungibo matsülangtsüla aser Nagaland yimjung asoshi Naga nung yimten yimsüsürtemi ano kanga süoki ia, Naga yimten tebilemtsü latettsübaren nung ya, tang dang nungi temulung tagütsüba agüja inyaksüla.

OLEMSABANG

ASEN LIMA NUNG AROGO AMENOKER KUM 149 ABENSABA BILEMTETER

~ Dr. Asangba Tzudir

Akhidang Otsüla Oboula nung mapang Ahom nung den ajurutepe shishilembaba indang otsüji temenungratsüka lir. Leptep-tsüngtep tensa mapang asenok Aortem ya tsükchir tsüba lenmang balala len nungi Assam bushibajia lenmang maka arem tzüpak dang nema senzüa liasü. Ahom nungeri repranga alinung luagi Tzüma lima nungjia Aortemji kati ka tsüpur ta, yamaji tsüputeba shishibaji ngur Ahom Chuba Sukhrangpha-i (1332-1364) Aortem rongnung aser Ahom nung den tesentaktep tajung yanglutsü atema Aortem tepong ka kümer lenmang ka yangludi ta ashi. Yamaji, Mopungchuket nung senteper Mongden par yim dak tainer aliba mapang pa den ajurua iba lenmang atema jembi aser Mongden jagi yim tuko sanger ayongteper Amguri tashi aremji chiteta pia alutsü aser Ahom nung jagia Aorji majuru tashi lenmangji pipoka atutsü ta joko yim tuko sangerji telong tenteter tetsübutep makai iba lenmang nung jajatsü ta jembitep. Yim tuko (9) ji Molungkimong, Yimjenkimong, Kilengmen, Longjang, Chami, Sünggratsü, Mopungchuket, Mongsenyimti, aser Khensa liasü.

Mapa kumteta oa pei pei lushi pia aru aser Molungkimong nung ajuruteper külemi piyonga alu. Yim tuko sangerji joko apok atemji shie bushia atuba mapang parnoki ola angashia ngaladang nung joko Ahom nungjeria apok temer ashijang onger ateperba liasü. Aor yim tuko sanger aser Ahom nung ajurutepeba tesemji 'Dodoor Alea' ya lir. Lenmangji piteta yur kelen Ahom Chuba Sukhrangpha-i lisü kodanga meyokdangba nashi ka agüja Rongpur nung watimesema nashiji tepseta chiyongtepa, aser ano koba yim-i kechi bener lua shishilembatsü ajia lemteta liasü. Nashiji chioker tepsettsü arishidang Molungkimong nung Yimyangpangba-i tama menepa nashi teyangtsüng nung lepa loadaktsü. Anungji iba anogo nungji Ahom Chuba Sukhrangpha-i Molungkimong dang Deka Haimong ta jatsü koba tetezü 'lanur yim.'

Iba lenmang dang Chubakati lenmang/Rongsensü talen ta jateter meyipa atua Molungkimong nung yipzü. Iba mapang nungi Molungkimong dang 'Ao rongpang mendang' yim ta naroküm agütsü. Iba Rongsensü talen lepteta ayuba ajanga Ao-Ahom shishilempa tesendaktep aser Aor-Ahom nung tsüngta tesendaktep tajungba aküm. Nükjidongbo shishilemba len senzütsü lapokba saka, iba Rongsensü talen aser watimesem (dupdoria haat) lapoka aliba ajanga Supongmeren, Godhula aser Clark nungera ajuruteptet aser Khristan yimsü aser shisaliok tasen asen limai arutsü asoshi lenmang lapok. Iba Rongsensü talen ajanga Khristan yimsü Osang tajung Godhula ajanga Molungkimong-i 1871 October ita asen Naga limai mezüng bener aru aser iba süngjang atangba November 10, 1872 nü Sibsagar nung Molungkimong nung kidong tabensa parnok 9 ji 'Tsüngrem tasen dakji amangaka aser yimsü tasenji agizüka baptiba yongji kechi tia arudir, temoatsü süshia yimkong aser atakatem süshia yimkong' ta yim mungdang nung azüngashir Sibsagar-i lua Dr. Clark-i baptitsü; aser ano December 22, 1872 anogo Dr. Clark-i Molungkimong nung parnok 15 baptija mezüng Arogo tenzüka tanü anogo joko asen Naga lima nung Khristar Arogo tenzüker küm 149 abensaba amunger. 2022 nungbo iba tatalokba Arogo tenzüka kuli nung amendaker ABAM aser NBCC-i anir 150 sesquicentennial amungtsüba sentong renemdar.

Asen tsüraburi koda Khristan yimsü aser shisaliok tasen arutettsüsa lenmang lapok, aser koda Godhula aser Clark nung mapang ajanga asen lima nung asenok Khristan kumdakja Arogo tenzüksü, item mapang tajung kodanga mamadokli, kechiyong ya mapa temela masü, aser ajia Tsüngremi Pai atemzüka ayuba mapa inyaksü latetba ajanga dang atalokba lir. Rongsensü talen ajanga Khristan yimsü tasen arutsübaji Tsüngrem dak alaka iba mapang otsüla oboula nungeriibo bilema meteta aliba sentong ka masü. Dr. Clarki mezüng Naga tenemi December 18, 1872 anogo Molungkimong (Deka Haimong) tonga atur süngkum anasa pai apudaker tenem kintem ajongai Kibuba Tsüngrem meteta ola tulu adoka Pa tenüng sangdakjangma, ta sarasademba ama tanü Naga Lima ajongai Tsüngrem tenüng asangba ola maneni ayimsünga odagi. Kechi temoatsü süngjangdong Naga nunger ajak asoshi Molungkimong nung rema yutsü, ibaji tanü Naga lima ajonga nung süngjang tajung tanger temoatsüji Naga nung ajonga agidar.

Mezüng Tsüngremer tenyar aser apulartemi kechi tenzüka yutsü, iba nungji amendaker tanü tashi Tsüngremer wadang balala Pa tenyartem nokdaka lir. Tsüngremi nenok wadang maneni moajangma aser ochi nung nokdaker Khrista Arogotem aser wadangtem tali tashi taitba nung nokdaksü Tsüngremi arishi aser tashi tasen maneni moajangma. Amen.

Christmas temoatsü agizükdi

~ S. T. Yapang Lkr. Kohima

Iba alima nung shibabo tebilemtsü makaba ali! Ajisüaka Christmas-i bentsüba temoatsütema khen bilemdangdi. Machimajemtsü nungi pilanüba taküm ka, iba asoshi ner yimer ajak senteper na meyaritettsü, saka ne sasa mulungteta Christmas temoatsü agiang. Na ochi jembia inyaksü arentakba taküm asü? Ner arogoi sayutsüngiba kija agi aji meperitsü mesüra ner yimeri na kangshia ochishir mekümdaktsütet, saka nai Christmas den temba yimang. Tang aliba jenjang nungi nüchi tia ka dangi meyipnür, ibaji Christmas asoshibo temelatiba mapa ka lir. Asen dak yimya tamajung kar melenshinür, aji Christmas-ibo temerenshi agi masü menürema melenshidaktsür.

Na alima tsübudang ochi o ka mejembitetra, nai kecha süngmanga teli aji asen Christmas den tsükchir asüba ajanga lir. Nai kinunger apia mesüra sentsü aketer jak repranga ola madok toktsüra na Christmas sempar senso rongnung tazünpur ka. Nai meyipa angutsü imla agütsüra nai Christmas den inki ashir ta angatetang. Asenji Christmas anemer ka süra kechiba Christmas pelateta amungtsü?

Mapang ka "Na madenyonga alima aser tamangba yimsü shitak aotsü" ta tsübutep, anungji shitak tai ta mali telok den adenera liasü, saka tanü Christmas ajanga nuchi pur asoshibo "Alima rangben madenyonga na shitak aotsü" ta kumogo, asen madenyonga alimaji aotsü, alima madenyonga asenjia shitak aotsü, kechiyong kin rangbenia asen menenji malangzüktet, saka Christmas ajanga dang asen nem kotak lenmangji lapoktsütsü. Iba kotak lenmang sayua taküma Christmas asen jakdang "Tarunür ajak arung, takümtzü, shisatsü, ochishiba, tasü tait, nüchi tia ano aika bena lir arung" ta yimyim ayima angadi lemyonga arudar, anungji ajemalua iba Christmas temoatsü pelasete agizükdi.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Arogoi Kohima-Wokha-Mkg ainlen senzürtem nem coffee agütsü



Kohima, Luchii/December 21 (TYO): Koinonia Baptist Arogoi küm shia inyaka aruba ama taküm-a parnoki Hombarnü Koinonia Prayer Centre, Tsiesema anasa Highway nung Kohima-Wokha-Mokokchung tsüngda ainlen ani-belema senzürtem nem coffee, süngo aser mapok-amsang angati lema agütsüogo, ta Koinonia Baptist Church, Media Ministry nungi Kikruneinuo Liezietsu-i sangdong ka ajanga metetdaksü.

Yisu Khrista asoba benjungmong- Khristmas tenüng nung küm shia Arogo nung lanurtem aser Jr CYE department-i küm iba highway nung ainlen jartem nem angati coffee aser süngo agütsür. Ajioda December 20 nüa temelunger lanur 150-i ainlen senzür nisung 2,100 dak tema nem coffee aser süngo den mapok am lema agütsüogo. "Iba ya Khristan dak sendakba maparen ka lir 'angati angu aser angati agütsür'. Onoki

tejangraba nung ainlen ani-belema senzürtem tenzüker aser iba ya tenla bushiba maparen ka masü. Iba mapa ya ajanga onoki alima dang temeim, yimjung aser tepela proker. Koinonia Baptist Arogoi ajak den tepela Khristmas aser küm tasen salem lemsateper," ta kasa sangdong ajangasa metetdaksü. Iba sentong tembanga Pastor, Neibalie Kiewhuo-i Tsüngrem nem tenügsang agüja sarasadema liasü.

Oshi 2,500 nung Laishiba meyiptsü atema mazüngi inyakdar

December 21, 2021: Oshi 2,500 nung Laishiba meyiptsü atema kanga mazüngi inyakdar, ta unfoldingWord lenir, Tim-i metetdaksü. unfoldingWord organization ya Evangelical Council for Financial Accountability (ECFA) nung züngsem ka lir. Tang alima nung oshi balala 7,000 dak tema jembir aser item rongnung oshi 50 dangbo "Gateway Languages" ta ajar. Nisung billion aikati Gateway Languages jembir aser ibaji ajanga Gateway Languages ya alima nung oshi balala nung Lai meyipzüksü atema apu

latsür ka mesük. "Gateway Languages Strategy ya khenyongi balaka aser iba ya ajanga English oshi nungi minority oshi agi meyipzüksü. Tang item ama 'gateway' oshi 50 shi lir," ta pai ashi. "Laishiba meyipba maparen tajungba akümtsü atema resource lira aser item resource ji gateway oshitem atema ngura alima nung Arogo ajaki itemji angutsü," ta pai ashi. Alima tesem ajungalen Khristantem ket nung nüngdakba hadir lira aser training agira ajaki Laishiba meyiptetsü aser minority oshi balala nung Lai

meyiptsü atema maongka angutsü," ta paisa metetdaksü. "Onoki gateway oshi 50 atema resource bushir, ajisüaka tangbo onoki gateway oshi tongti tenet atema rangloker inyaker," ta pai ashi. Tawa Sudan nunga Arogo lenirtem nem Laishiba meyipba indang training ka agüja liasü. Gateway oshi tenet rongnungji Sudanese Arabic densema lir. "Mezüngbuba training workshop nungji maparen tenzüksü atema dang tesayuba agütsü aser training agütsütsüpurtem nem training agüja liasü," ta Tim-i ashi.

Shisaliok tajung agütsüba atema Khristantem dang pelar: Mamata



December 20, 2021 nü Kolkata nung West Bengal Chief Minister, Mamata Banerjee-i 11buba Kolkata Christmas Festival tenzüksüadang tangokba noksa nung angur.

Kolkata, Luchii/December 21 (Agencies): December 20, 2021 nü Trinamool Congress tongti lenir aser West Bengal Chief Minister, Mamata Banerjee-i Kolkata nung aliba Allen Park nung 11buba Kolkata Christmas Festival tenzüksüogo. "Iba sentong nung jembidang Mamata-i, "Tesem ajaklen yimtenren menena lir aser yimtenren tsütsü telemsa adoka aliba agi linük

amokmerener aser yimjung raksaba den alima tatsükba akümba ajanga tzü-mopung raksatsür. Loktiliba nung yimjung aser tesünap alitsü atema tang Khristmas mongpu nung asenoki longjemer inyaksüla," ta ayongzü. Iba sülen Mamata Banerjee-i Park Street nung aliba Allen Park nung 11buba Kolkata Christmas Festival tenzükjia liasü. "Linük tashi aittsü atema

telongjem alitsüla. Asenok longjema lir aser iba tongbang longjemer raratsüla. Tamangba yimsü ajaki longjema alitsü tesayuba agütsür," ta lai ashi. Laisa, Khristmas tanela ajanga Vatican nungi Goa tashi aser Goa nungi Kolkata tashi taochi aser tesünap alitsü ni sarasademer, ta ashi. Lai Goa nung aliba St. Francis Xavier leper semdangba dak sendakba nung lai, "Yangi St Xavier's college aser university aliba ya asenok atema temoatsü ka lir. Yangi asen chirnurtem nem shisaliok tajung agütsüba atema onoki Khristan putirtem dang pelar. Khristantemi shisaliok reju tajung aika amenokba atema ni Khristan rejutem dang pelar," ta ashi. 11buba Kolkata Christmas Festival ya anogo ter tashi amongtsü aser iba sentong nung Arogo choir temi ken atenba den nüngtugu ken tener telok aikatia shilem agitsü.

ANOGO ABEN TSÜNGREM DEN

Tekolak ka dang nungi ana tajungba

Ka dang nungi ana tajungba kechiaser parnoki inyakba asoshi taa tajung lir. Sayutsüngir 4:9

Alima nung mapang ajak nung shisatakatiba Solomoni ibai zülü. Pa chuba tajung ka, Tsüngrem shisatsü agi sünga liasü aser bendangtsür pa kinüngtsütem asütsü agir külen pai ochi Tsüngrem toktsür tangar Tsüngremtem sülen anidak. Taküm tatem len Israel Tsüngrem nungi pilar pei sasa jangratem leman bushiba amajok ta pai zülü. Pai meimchir shisatsü amajok mesüra tamachi, meimchir kisüngi merangba aser takok amajok ta zülü. Pai meimchir tashi, merumeru, bendenba aser yimsü amajok ta jemb. Item ajakji mopung sülen arishiba ama lir. Saka item jembiba tiyong nung Solomoni kijai mesüi yaritepba inyakba koda tongtipang iba indang jemb. "Ka dang nungi ana tajungba kechiaser parnok mapa asoshi taa tajung angutsü."

Takümji lokti kümteta alitsü asoshi yanglu. Eden Tsüki nung Eva matsüngdang ibai angatet. Taküm sendaktepa alitsü yanglu, kija alitsü atema masü. Kari pei mulungba nung dang aotsü bilemer, pei mulungba dang inyaksü bilemer. Saka atangji tekolak ka dang nungi ana tajungba lir. Ibai satiba nung dang masü, saka shishilembaba aser arogo nunga shidak lir. Ka mapa kar nung tebilemba tajung alitsü akok, saka tanga ka nungbo kecha memetetti alitsü akok. Anaji kati ka yaritsü akok. Tashi taitsangi tashi maitsang yaritsü akok, ano iba dang nungi tajungba, "Lisü asem mesentepbabo yakta metokdangtsü" (t.12). Tembar ayimba nung, satiba, shishilembaba tesendaktep, yamala, nung Tanela Temeshi den sendaktepba lira tashi itta alitsü. Asen Teyangluri asenok sendaktepba alitsü yanglu ta bilemtettang.

Kibuba, kü taküm nung tabensa tesendaktep aliba asoshi Ne tenüng asanger. Adianu dang nungi Na kü den anasaba lir. Amen.

DISCIPLESHIP BIBLE COLLEGE CHRISTMAS EXTRAVAGANZA

Khristmas Salem ajak dangi Discipleship Bible College, Mt. Miracle nungi lemsateper. Khristmas ya Yisu asoba tepela osang lemsatepa, Tsüngrem tenüng sanga, külema amongba mongpu lir. Yamaji asen Kibuba Yisu Khrista asoba benjongmong sentong balala yamai agia arudaki.

- 1st Dec : Advent Christmas
- 19th Dec : Christmas Hymnal Singing
- 20th Dec : Christmas Cantata
- 21st Dec : Christmas Pageant
- 22nd Dec : Christmas Concert
- 23rd Dec : Christmas Shadow Drama
- 24th Dec : Christmas Spectacular
- 25th Dec : Christmas Extravaganza (Open Air)

Nübor ajak den Khristmas tepela osang lemsatepsü asoshi 25th Dec aonung 5:00 ako nungi Signal Angami Public ground nung Open-Air "Christmas Extravaganza" sentong tajung yanglua lir. Asen kümtetdakba Yisu nem akümtsübu aser tetushi agütsüba sentong nung temulunger ajak arua temoatsü angutsü asoshi Rev. S. Wati, Principal aser DBC community-i pelashishia joaker.

Houston nung Khristmas sentong agidang nisung 1100-i Khrista agizük

December 21, 2021: Tawa Iba sentong nung Khrista Houston, Texas nung aliba agizüker shia nem Laishiba kaka Arogo ka nung Khristmas agütsü aser parnok atema sentong ka agidang nisung 1,100 ghonda 48 temeja sentong ka dak temai Khrista agizükogo. agija liasü.

Champion Forest Baptist Khrista nem taküm Arogoi küm shia December 8 bendanga agütsürtem den nungi December 12 tsüngda jembidang pastor-i, "Nenoki pei Khristmas dak sendakba temeja taküm nung alima tesangwa sentong ka agia arur. Khristmas agizüker, aser onoki nenok dang show ji tembanga Arogo nung iba tesangwaji sayuner," ta ashi. tongti pastor, Jarrett Stephens-i Champion Forest Baptist Arogoi YouTube video ka Tsüngrem O jembia liasü aser ajanga, Arogo züngsemtemi pai lokti dang, nenoki pei taküm Tenla kidang Tsüngremi mapa Khrista nem bendanga mapa agütsütsü melungtetra nenok inyakba kuli süa nguogo, ta ashi. ket nung aliba phone torch light Arogoisa, "Nisung 1100 dak mepishia liasü. Ajioda iba tema taküm melenshiogo. sentong nung nisung 1,114-i Khrista osangtajung ajanga parnok teti atema taküm melenshiogo. Khrista nem pei taküm züngsemtemi Tsüngremer yimli bendanga agütsü. atema inyakba atema nenok

Osangbener den jembidang pastor-i, "Tsüngrem arakzüdar ajak dang pelar. Iba sentong aser sentsüwangshi ajak Pa tembangogo saka iba ya meyong süang. Iba ya tetenzüker dang. Kibuba, Nü Tsüngrem atema dang lir," ta nem tenügsang agütsür," ta ashi. metetdaksü.

OLONG PAITEP # 6034

1		2				3		4		5
				6						
	7		8							
9					10			11	12	
			13			14	15			
16					17			18		
				19		20				
21		22								23
24										
							25			

TIPIEN

1. Saku - (4)
 6. Songjen - (7)
 7. Mali/Tazung - (4)
 9. Tasen apok - (6)
 11. Songtem - (3)
 13. Ata liasü - (5)
 16. Tzunglu den külemi tsüker - (3)
 17. Aso tila - (6)
 20. Tashi maküm - (4)
 24. Tenüng kasa jatepba - (7)
 25. Ki yangluba oset - (4)

LANGTSÜNGLEN

1. Taksep - (3)
 2. Langtem - (5)
 3. O tamendaktak - (4)
 4. Nütsü tebuba - (3)
 5. Anüngdang tesangwa - (3)
 6. Apitet - (5)
 7. Yagi jungdaksür - (4)
 8. Anogo semer ka - (3)
 10. tatsü - (3)
 12. Tebür kidong aser zunga kasa tsüngda jatepba - (4)
 14. Pela agizükba tapu ka - (5)
 15. Tenüng atet - (3)
 18. Mejanga onü - (5)
 19. Talak techira - (4)
 21. Maneni - (3)
 22. Nübo teyi - (3)
 23. Meshi - (3)

OLONG PAITEP # 6033 TELANGZÜBA

TIPIEN :

2. Anükalem, 4. Mesak, 5. Apet,
 9. Meimtep, 11. Posü, 12. Patak,
 13. Tekettsü.

LANGTSÜNGLEN :

1. Kumdang, 2. Ayak, 3. Leptep,
 6. Sati, 7. Yiar, 8. Sangküm, 9. Metsük,
 10. Mazü.



ALOKBA OFFICE PEON :

- Alokba** : Sir, ni ojala asüba agi asüngbo leave aginera.
Sirba : Aree, küm shia nabo nütsü asür na, yakümang nütsü kabo süokoto.
Alokba : Sir ato na, ni mashiashi obala toagi yakta dang ka aniokba agi ajia ojalasa asüngto.
Sirba : Application form ji)fill up sür agüjangma.
(Tatsüka lir külen)
Sirba : Alokba, ya application nung designation column nungya VIP ta züluba ya kechi? Na VIP asü?
Alokba : Sir, nai merateter dang ashi VIP tetezüji tanga meaninga lirko, niji küla Very Important Peon mmako, ni melira office nungji nenoka anogo kata meliteter südito? Important ako nooo.
Sirba : Oh Alokba!

Lilir : WhatsApp

TANÜBO NAI LANGZÜANG

Q. Koba tentet ajanga "Tracking Universal Coverage - 2021 Global Monitoring Report" saya?

[A] WTO [B] WHO [C] FAO [D] WEF

===== (Taruba adok nung onoki langzütsü)

YASHI ADOK TELANGZÜBA : Malini Parthasarathy

AO OSHI ANGAZÜKDAK:

TANÜ ANGAZÜKTSÜBA OJANG



Lokzük

(v) agizüka endok (pull out)


* Kü tepo ka tamajung akümba agi doctor-i **lokzuka** endoktsü.

Lulen

(adv) kenüyongi orr aru (return on the same day)

* Anogo shia ni alui **lulena** orr adoker.

NAI-A YA METETTER MA



1885 küm December 22 nü Itô Hirobumi ya Japan indang mezüng Ato Kilonser aküm.

SUDOKU # 6074

	5				1	2			8	3	5	4	7	6	2	9	1
9				5			8		1	7	4	3	9	2	6	5	8
	3	1	2	8	7	5		6	2	6	9	1	5	8	4	3	7
		3	5			9	2	4	9	1	6	8	2	4	3	7	5
		4					3		7	5	3	9	6	1	8	4	2
	8				9			7	4	2	8	5	3	7	1	6	9
3		8	9	7		4		2	5	9	2	6	8	3	7	1	4
	4		8	3	2	1		9	6	8	1	7	4	9	5	2	3
	7	9	1	6				8	3	4	7	2	1	5	9	8	6

TELANGZÜBA # 6073

OJANG LUTEP # 5620

- MAJTAUNG :
 NGDA :
 EMBBILA :
 NGAJAA :
 KÜTAM :
 NGNU :
 JUNTAG :
 AKTSINYÜ :
 HIASOS :
 MTETERATER :

OJANG LUTEP TELANGZÜBA # 5619

OCHI MAPA KA AITSÜTSÜ ASOSHI TIYAZÜ KULI
 AIKA BENER ARUR

TAN HOPTA ATEMA - KOMA SÜLA ?

Q. Nagaland government nung tatar yimsüsürtem ya Naga National Workers o India Government na tsüngda o tongdar aser teyariteper dang masü saka Naga yimten tebilemtsü ken o tembangtsü atema, India den tongti shilem agia Naga yimten ken o süoka jembir aküm nunga koma süla ?

Olong 20 shi nung December 22, 2021 tashi nung iba telangzüba ya onok dangi (e-mail - tiryimym@gmail.com) :

(SMS - 9856121232 / 9436072422) : (WhatsApp - 7005723372 / 8729995804) : (tirimym.in) ajanga yokang. Telangzübatemji taruba Honibarnü adoktsütsü.

PM Modi-i SHG tem indang account nung sen cr1000 inoktsü



Ato Kilonser Narendra Modi-i Prayagraj nung tesürtem atema sentong balala tenzüksüba mapang tangokba noksa nung angur. Union Minister of state Anupriya Patel aser Sadhvi Niranjana Jyoti, UP Chief Minister Yogi Adityanath aser Deputy Chief Minister Keshav Prasad Maurya nungera noksa nung angur.

Prayagraj, Luchii/ December 21 (Agencies): Ato Kilonser Narendra Modi-i Mongolbarnü, tetsür lakh 16 shi ajangzüksü atema self help group tem idang account tem nung sen crore 1000 inoktsüogo.

Iba sen ya Deendayal Antyodaya Yojana-National Rural Livelihood Mission (DAY-NRLM) kübok inoktsü, kong self help group (SHGs) 80,000 nem community investment fund sen lakh 1.10 aser SHG 60,000 nem sen 15,000 (telokshia nem)

agütsüba densema lir.

Iba mission ya tetsürtem aser talisa tekübokba jenjang nung aliba tetsürtem nem tenüngdakba skills, incentives aser resources agütsütsü nükjidong nung tenzü.

Tanü Prayagraj nung sentong ka ayongzüka agiba mapang tetsür lakh ana dak temai shilem agiogo. Iba sentong nung Uttar Pradesh chief minister Yogi Adityanath-ia shilem agia liasü.

Kasa mapang nung Modi-isa, 'Mukhya Mantri Kanya Sumangala Scheme' kübok

beneficiaries lakh ka dak tem atema sen crore 20 dak tema agütsüogo. Iba scheme yagi tetsür tanur ka nem la taküm nung jenjang balala nung senotsü teyari agütsütsü.

Remittance ajak senteper beneficiary shia nem sen 15,000 agütsütsü.

Maneni Ato Kilonseri, district 43 nung supplementary nutrition manufacturing units 202 amenoktsü atema nüngshilong azüngtsüogo. Item unit tem ya SHG temi fund asür aser unit shia sen crore ka shi intoka yanglutsü.

Angopurtem chiokdaksütsü atema sensaksem dar: MEA

New Delhi, Luchii/ December 21 (Agencies): Ministry of External Affairs (MEA)-i Mongolbarnü ashiba agi, India nung angopur 68 aser rong 10 Sri Lanka nung ketdangsurtemi December 18 aser 20 tsünga Tamil Nadu nungi pua bener ogo.

MEA otongdar Arindam Bagchi-i, "India nunge angopurtem sota yua aliba ya tebilemtsüka," ta ashi.

Consulate General of India nung ketdangsur Jaffna-i, sota yua aliba angopurtem den ajurutepegogo aser parnok nüngdakba teyari ajak

agütsüogo, ta Bagchi-i ashiba den teyari agütsüba rongnung süoshi, toiletries, snacks, dry essentials aser mask amala densema lir aser iba den parnok kinungertem nem phone ajanga tongtepratepdaksüogo. Consulate-isa okatsürtem anepalutsüdar, ta ashi.

Shiranga aliba angopur ka indang jembiba mapang Bagchi-i, Indian consular officer-i pa den mozükidang ajurutepegogo aser pa tenüngdakbatem angadangogo, ta ashi.

"Colombo nung India High Commission-i, angopurtem aser rongtem takaratiba nung chioktsü

atema Sri Lanka sorkar den sensaksem dar," ta pai ashiba ANI sangdong ka ajanga metetdaksü.

Maneni Bagchi-i ashiba agi, political party balalai external affairs minister S Jaishankar nem iba ken o dak sendakba nung takhangba balala agütsüogo. "Iba ken o dak sendakba nung Tamil Nadu chief minister-ia pa den sensaksemogo. Pai inyakyimtem parnok ajak nem metetdaksüogo aser India sorkari angopurtem takaratiba nung chiokdaksütsü atema inyaksangshiba indang metetdaksüogo," ta MEA otongdar-i shisem.



Kopar Khairane nung alirtem atema vaccine agütsüba sentong nung Navi Mumbai Municipal Transport bus ka telung nung beneficiary ka nem Municipal Corporation worker kati covid vaccine agütsüba noksa nung angur.

Rajya Sabha nunga Electoral reform bill agizükogo

New Delhi, Luchii/ December 21 (Agencies): Aadhaar ecosystem nung electoral roll data sendakteptsü aser election inyakyim nung temelenshi bener arutsü atema benokba bill Rajya Sabha nunga Mongolbarnü voice vote ka ajanga agizükogo. Iba bill ya Lok Sabha nunga Hombarnü agizükatokogo. Bill anemba temaitü opposition temi house toksür oa liasü.

Bharatiya Janata Party (BJP), JD(U), YSRCP, AIADMK, BJD aser TMC-MP temi iba bill pusemba sülen Rajya Sabha nung Election Laws (Amendment) Bill, 2021 agizükogo. Parnoki ashiba agi, iba bill agizükba ajanga electoral rolls nung taila voter tem tenüng agintsü.

Ajisüaka Congress, Trinamool Congress, Left parties, DMK aser Nationalist Congress Party amala opposition party züngsemtemi iba bill magizüki house toksür ao.

Opposition temi iba bill standing committee ka dangi abentsü atema akhangba mapang Lok Sabha nung mapang tatsüka sensaksem agizüka liasü.

Election Laws (Amendment) Bill, 2021 ajanga electoral registration officer tem nem voter ama züngoksemtsü jangraba nisungtem indang

Aadhaar number meshitsü temelaba agütsütsü.

Bill ajanga nisung ka tenüng constituency ka nung aiben züluoka aliba mesüra constituency balala nung kasa tenüng züluoka aliba mita repringtsü atema tang electoral roll nung tenüng alirtem danga Aadhaar number meshitsü asoshi electoral registration officer tem nem tashi agütsütsü.

Rajya Sabha nung Opposition lenir Mallikarjun Kharge-i Mongolbarnü Centre aija, Election Laws (Amendment) Bill, 2021 dak sendakba nung kecha sensaksem makai agizükogo, koba democracy mezügmeshiba ka lir ta ashi.

"Modi-i aniba sorkari sensaksem kecha makai Election Laws 2021 amendment bill agizükogo. Iba bill ya SC Puttaswamy judgement anema lir aser iba ajanga nisungtem aika disenfranchise sütsütsü. Iba bill ya kodaser sensak mesemi mesera masadangi agizüktsü. Iba ya democracy mezügmeshiba maparen ka," ta Kharge-i Upper House nung iba bill magizük tsünga tweet asü.

Mongolbarnü Centre-i ashiba agi, iba temelenshi ya nügdaka lir, kechiyong iba ajanga temelenshi agi electoral system ajangzüksüba indang osang tejangja agütsür.



Rajya Sabha MP 12 mapanungi anentsüba anema Gandhi kerak yanglu nungi Vijaya Chowk tashi longkak aita senzüba sülen Congress lenir Rahul Gandhi aser aser tanga opposition lenirtemi osangbenertem den sensak asema noksa nung angur.

Lakhimpur Kheri ken o nung Gandhi-i PM aitsü

New Delhi, Luchii/ December 21 (Agencies): Congress lenir Rahul Gandhi-i Mongolbarnü Lakhimpur Kheri nung tatalokba dak sendakba nung Centre sorkar aitsüogo aser ashiba agi, Ato Kilonser Narendra Modi aluyimertem dang tatok meshiogo saka Union minister Ajay Kumar Mishra mapanungi manentsü. Iba lendong nung nisung ti tashi taküm samaa liasü.

Mongolbarnü osangbenertem den sensaksemba mapang Rahul Gandhi-i, "Opposition-i maneni Lakhimpur nung tatalokba benoker. Minister ka jabasoi aluyimertem tepset. Report ajanga iba lendong ya aibelen ka masü saka jeleia renemer aliba sentong ka ta shiogo. PM Modi-

i iba dak sendakba nung kecha jenjang magi. Nai (Modi) aluyimertem dang tatok meshiogo, saka minister mapanungi manentsü," ta ashi.

Gandhi-isa, Union minister Mishra-i, Lakhimpur Kheri nung aluyimertem tepsetba ya aibelen ka ta ashiba aija, "onoki pa (Ajay Mishra) metoktsütsü; tanü mesera asüng pa tepuokdaki yoktsü," ta Gandhi-i osangbenertem dang ashi.

Taoba hopta Congress lenir yagi Lok Sabha nung special investigation team's (SIT) report dak sendakba nung adjournment motion ka benok, kong Lakhimpur Kheri nung tatalokba ya jelia sentong renema yur asaa inyakba maparen ka ta shia lir.

(Maneni tapak 10 nung...)

DRC anüdoklen longkak aiter kar asü

Goma, Luchii/Dec. 21 (Agencies): Democratic Republic of the Congo (DRC) anüdoklen Goma yimti nung longkak aiter aser security forces tsüngta raraba mapang nisung aika asü, ta osang ajanga ashir.

Tensa mazüoktetba aser tensa azüoktsü asoshi kidanger Rwanda linük nungi security forces arutsü akok ta amanga Hombarnü longkak aiterem adenshia long tulu agi yimtung chanatsü, saka Congolese sorkari yamaji masü, ta ashir.

Longkak aiterem anepdang yakta lenmang nung adenshia barricades tem amenok aser tyre ronga liasü. North Kivu province yimtiba nung prangbong ola angashi aser police temi tear gas aser injang amshia longkak aiterem arishia liasü, shirnoki sepai ket nungi prangbong asem auya aser security post amak, ta tai tongloksü.

"Police ana asü aser ana kangasa mejungi yiru. Iba ama mapa ya memerenshi metoktsütsü," ta North Kivu

province nung military governor atema odongtar kati ashi.

Longkak aiter ka motorbike nung lia kaset, ta yangji aliba lenir ka ase police osang ka ajanga ashi. Hombarnü civilian ana tepset aser trok yiru, ta Goma indang civil society tir Mario Ngavho-i osangbener dang ashi.

Yimti nung mapa tamajung inyakba tali akumba aitsütsü asoshi yimti shibangtsü sangdongba sülen yimti tiyong nung aliba shishilempadak tesem tongtipa shibang, bank aser school tem shibanga liasü.

North Kivu aser Ituri province nung telungpur telok balalai lendong agütsüba agi Goma nung alirtem lakogo, aser iba ama mepetmesü aliba mechi May ita sorkari "state of siege" sangdonga tongtipang tesemtem nung civil servant tem melen a sepaitem yoka liasü.

Ajisüaka anogoshi amai azüdokshiba ajanga parnok tasa ya shidak inyaka asür asü masü ta tasüngdangba ka arur aser longkak aiteremi state of siege ya asadangshitsü ajungshir.

Arütsü alema oa shibelenba azüoktsü asoshi taoba ita linük ana tsüngta tezüngzüktep agiba sülen Goma-i Rwandan police temi aitba ya khenyongi magizüker, ta longkak aiteremi ashi.

"Goma-i Rwandan police tem aruba onoki magizüksü. Onok dang parnoki kechi miimshir?" ta longkak aiter kati ashi.

Ajisüaka Goma nung tensa azüoktsü atema Rwandan sepai nem nunglokja mali, ta DRC ketdangsürtemi ashir.

"Goma nung Rwandan police lir ta jembiba ya 'illusions' ayokeri bilemba ka lir aser tamangba yimsü tamajung amangba nüburtemi bilemba lir, shirnoki olulu prokshia mepetmesü adokdaksütsü kisüng atema bilemer," ta military governor indang odongtar Ekenge-i ashi.

Linük ana tsüngta küm 30 shi rara aru, aser 1994 küm Rwandan nung tepsetba nung shilem agir ethnic Hutus tem DRC nung atsükokdaksür, ta Rwanda-i aitsür.

Yemen nung Iran lenir ka COVID-19 agi asü

Tehran, Luchii/Dec. 21 (Agencies): Yemen nung Iran indang top diplomat, Hassan Irloo temang anepalutsü atema Tehran-i anir aoba sülen COVID-19 agi asü, ta ketdangsürtemi ashi.

Arishi küm 63 tain Irloo ya taoba küm Houthi teloki amokbanga aser rara agi raksatsür aliba tesem nung Iran indang ambassador asütsü shimteta liasü, kong Yemen nung linük balalai agizükba sorkar yaria Saudi Arabia-i anir mitkar teloktep kati küm tenet tashi rara arua liasü.

Irloo ya Islamic Revolutionary Guard Corps nung züngsem ka liasü, ta jembir aser pa tayimtsü nung Iran yimtibai Honibarnü anir

aotsü asoshi Iraq aser danga linüktem arua liasü, kechiaser Yemen ajanga tayimtsü jajaba nung Saudi Arabia-i tenokdangba agüja lir.

Iran indang foreign ministry ajanga Mongulbarnü sangdong ka nung ashiba agi, linük kari menu rang amalitep akaba yong Irloo ya menu rang linüki anir arutet aser iba sülen COVID-19 agi asü.

Irloo anir aotsü temelen Saudi nung tepuokdak yua alirtem kar chiokang, ta Riyadh-i Houthis dang asüngdanga liasü, ta osang ka ajanga ashi.

Irloo ya Iran aser Iraq tsüngta 1980s nung küm ti raraba nunga shilem agia liasü aser Saddam Hussein

sepaitemi miim aketba nok-onü amshiba nunga yirua liasü, ta Iran foreign ministry ajanga ashi.

2015 küm tetenzüklen Houthis anema Saudi Arabia-i military campaign ka tenzüik, saka sorkar anemer (Houthis) temi linük yimtiba, Sanaa aser linük north tsütsü tesem timba amokbanga lir.

Küm aika maneni raraba ajanga Yemen nung nüburtem kanga tim atemer, saka rara anendaksütsü merangba nung takok mongutet.

Iran-i Houthi nung nem ballistic missiles, drones, training aser shisa agütsür, ta Saudi aser United States ketdangsürtemi tai tongloksü, koba Tehran-i magizüker.

Japan nung tepuoker 3 aletseta südaktsü

Tokyo, Luchii/December 21 (Agencies): Japan-i Mongolbarnü tepuoker asem aletseta südaktsüogo, koba küm ana tsüngda mezüngbuba liasü. Sorkari ashiba agi, ozüng alema inyaksangshiba nokdangtsü atema tasüba agi merenshiba temerenshi agütsütsü nüngdaker.

Tasüba agi temerenshi agütsüba mintoki aliba linüktem rongnung Japan-a ka lir, aser alima kin balala aser talisa rights teloktemi iba inyakyim aijaka nüburtemia iba inyakyim pusema arudar.

Japan nung tang nisung 100 dak tema tasüba agi merenshitsü obendang agütsür lir aser parnok rognung timba nisung aika tepsetertem lir. Item nisungtem ya aitsüba sülen mapang talangka lirang aletseta südaktsür.

Mongolbarnü aletseta südaktsürtem rongnung Yasutaka Fujishiro, 65 densema

liasü, shibai 2004 küm martol aser kotari amshia pa indang arishi küm 80 tain aunty aser cousin ana aser tangar pezü tepseta liasü, ta justice ministry otongdar kati AFP dang ashi.

Tanungba ana ya arishi küm 54 tain Tomoaki Takanezawa aser 2003 küm arcade game parlour ka nung clerk ana tepsetba nung pa nem teyari agütsüsang arishi küm 44 tain Mitsunori Onogawa lir.

Ato Kilonser Fumio Kishida lenisüba nung tang mezüngbuba tasüba temerenshi agütsüogo.

"Tasüba agi merenshiba ya maneni benshitsü mebenshitsü aji Japan indang criminal justice system foundation dak sendaka lir aser iba ya kanga tongtibang," ta deputy chief cabinet secretary Seiji Kihara-i ashi.

"Azütokshi tatalokbatem ka khen ka khen ta atalokyonga aoba dak ajemdaker tai tulu

menartem tasüba agi merenshitsüji kanga nüngdaker, anungji tasüba temerenshi agüja aruba agintsüji tapet masü," ta paisa ashi.

Kasa mapang nung Japan-i 2019 küm tepuoker asem aser 2018 küm 15 tasüba agi merenshiogo. Aletseta südaktsürtem rongnung Aum Shinrikyo cult züngsem 13 densema liasü, shirnoki 1995 küm sarin gas amshia Tokyo subway amak.

Küm aika ketdangsürtemi tasüba agi merenshitsü asoshi obendang agütsür alirtem nem parnok tepsettsü ghonda ishika dang lia osang agütsür.

Sorkar inyakyim anema tepuoker anati ken o benokogo. Tenati ashiba agi, iba inyakyim ya ozüng alema aser iba ajanga parnok anisüngzüka meliteter.

Tenatisa parnok tepsettsüba anogo mejangjaba ajanga

DIMAPUR AONOKPU SENSO TELONGJEM

OFFICE OF THE

DIMAPUR: NAGALAND

Tenüngsang Agütsür

Wabong Longri Imsong aser Watsü Narola Jamir, tena jabaso Sangpang **Imti Imsong**, pai Northeast telongtet nungi Konang-tetushi tulu aketba sempet, **Dak Seva Award 2020-2021** ngutetogo. Iba sempet ya Department of Posts-i achaayangba maparen ka lir, aser ibaji tangar dang nungi alaktetta inyaker aser maparen aisü nung takok angur Tajungtiba nem agütsür. Iba ama tetushitsü temsüa takok ngutetba yabo pei kija asoshi dang masü, saka pei senso nübur ajak asoshi nümadangtsü mapa lir, ta angatetta Dimapur Aonokpu Senso ajak pelateper aser tenüngsang tulu agütsür.

Ajak dak alaka asen Tsüngrem nem tenüngsang tulu agüja, tarutsü anogotem nunga pa taküm aser lenmangtem moajangma ta sarasademsütsü senso nübur ajak dang nenshir.

Sdl/- C. Bendang Longchar
President

Sdl/- Imti Imsong
Secretary



Office of the
Asetkong Kaketshir Telongjem
Mungdang

Hq: Kubolong - 798615

KONANG TENÜNGSANG AGÜTSÜR

Asetkong Kaketshir Telongjem Mungdang (AKTM) ajanga senso shirnoki pei wadang balala nung nendaka inyaka takok tulu ajangzüktetogo, nenok ajak nem konang tenüngsang tulu agütsür.

1. Shri. S.Temjen Aier (Longjang) S/o Lt. Sowa Aier Additional Director, Dept of School Education, Nagaland promotion anguba.
2. Shri. Alem Ao (Longjang) S/o Lt. Chuba Ao SDEO, Meluri promotion anguba.
3. Smti. Tsukjemchila Jamir (Longjang) D/o Mr.Bendang T. Jamir Chief Manager, SBI Mokokchung promotion anguba.
4. Shri. Arizungba Longchar (Süngratsü) S/o Mr. Temsusashi Longchar SDO under EE PWD (R&B) Mokokchung promotion anguba.
5. Shri. Kelangtemsu Walling(Süngratsü) S/o Lt.Nungshitoshi Walling Extra Assistant Commissioner jenjang takok anguba under Personal and Administrative Reforms Department through NPSC - NCS,NPS & Allied Services-2019
6. Shri. Imkumnixung Aier (Süngratsü) S/o Mr. Imsutemjen Aier Station Superintendent/ Enforcement Officer jenjang takok anguba under Nagaland State Transport Department through NPSC - NCS,NPS & Allied Services-2019.
7. Shri. Talikaba Longkumer (Longjang) S/o Mr.Marnungsang Longkumer-i Mr. Mokokchung 2021 jenjang ajangzüktetba.
8. Shri. Tinuwati Longchar (Longjang) S/o Mr. Nokzen Longchar -i Mr. Mokokchung 2021, 1st Runners Up jenjang ajangzüktetba. .
9. Miss. Alemnungla Jamir (Sungratsu) D/o Mr. Suponglolen Jamir -i Miss Mokokchung 2021, 2nd Runners Up jenjang ajangzüktetba. .

Tarutsü anogotem nung Tsüngremi nenok pei -pei wadang balala ajak nung tali moajang ta sarasademsür.

Sdl/-
Lanulemba Longchar
President

Sdl/-
Merensangba Aier
General Secretary

shisabulua toktsüba atema compensation, yen million 22 meshiogo.

Kuli kakettem ajanga, Japan-i tepuokertem nem parnok tepsettsüba indang osang agüja liasü saka 1975 küm sülen anenatok, ta sayuogo.

2020 küm December ita Japan nung okadak tematibai nisung ka retrial asoshi nokdanger aliba agintsü atema tetuyuba agütsü aser iba ajanga arishi küm 85 tain tepuokdak yur alisang nem timla agütsüogo. Pa ya alima nung tasüba agi merenshitsü atema obendang agütsür alirtem rongnung tepuokdak talangtiba ayuba tepuoker lir.

Iwao Hakamada tasüba agi merenshitsü obendang agütsüba sülen pa küm 50 dak tema tepuokdak yua lir. 1968 küm pai par kibur, kinungtsü aser par chir ana tepsetba den parnok rongsen

rakzürakdemba atema aija liasü.

Ajisüaka pa aser pa pusemertemi ashiba agi, police temi pa dak kanga mejungi züka merenshiba sülenang pai iba aibelen nangzüker aser kulitem ya pai tepset ama sayutsü atema toktsüba liasü.

Alima ajunga nung taoba küm linük 18 nisung 483 tasüba agi merenshiogo, ta rights watchdog Amnesty International-i ashi.

Koba 2019 küm dang nungi shilem 25 agi tajemba liasü aser 2015 küm nungi tajemba küma aruba sayur.

Ajisüaka tasüba agi merenshirtem rongnung China, North Korea aser Vietnam nung tepsetertem densema mali. China nung nisung tepsetba indang data meimshir.

G7 group rongnung Japan aser United States nung dang tang tashi tasüba agi temerenshi agütsür.

MULUNGREN O

Late. L. Imchameren Longchar (Nokpu) - (1917-2021)



Asür Wabong L. Imchameren Longchar (Nokpu) Tsüngremi arishi Kum 104 ita 11(terka) tashi moatsür 01/12/2021 anüpdang iba akümli toktsür or onok mangyim tia nung aliba mapang kija, kibong, Arogo, Yimden aser lokdi balala kwikadi ana aser talang nungi arua nübu, rongsen aser tamang sarasadem agi onok nungita yariogo, nenok ajak dang kanga pelaba lemsateper.

Iba dak alia teküpoken agüja aliba lokdi aser kija, kibongtem dang balaka pelaba lemsateper.

1. Longchem Baptist Arogo.
2. Longchem Nokpu Senso Telongjem.
3. Longchem Town Adhoc Committee.
4. Nokpu Village Council.
5. Nokpu Baptist Arogo.
6. Nokpu Longchar Kidong.
7. Saringyim Baptist Arogo.
8. Aonokpu Yimsen Baptist Arogo.
9. Japukong Kaketshir Mongdang.
10. Longchem Pensioner Association.
11. Mr & Mrs. K. Tia Aier, Ex Minister.
12. Dr. Longrineken Advisor Works& Housing and Treasury & Accounts.
13. Kohima Nokpu Tamang Telongjem.
14. Mr. C.T Jamir, Senior Advocate.
15. Mr. Bendangliba, Rtd Director Industries and Commerce
16. Er. Kima Lkr, Director New Renewable Energy
17. Mr. T. Wati Aier, D.C Kiphire
18. Mrs. Ajungla Tali
19. Er. J. Lanumar Longchar, EE Water resources
20. Er. J. Walter Longchar, Rtd Addl Chief Engineer PHE.

Onoki nenok temeim aser teyari meyipa magütsütetsü, saka tematiba asen Tsüngremi nenok ajak talubosa moajangma ta sarasademtsür.

Temeim Chirnurtem, Anük Apang aser semchi- semnurtem.

Mulungnen O



ASÜR. MANGYANGTEMJEN LEMTUR
(ASO: 30.01.1965 - ASÜ: 17.12.2021)

Onoki teti meima aliba asür Mangyangtemjen Lemtur, timtemba mapang nungi akumli wadang tempangba mapang tashi lokti aser kija kibong shirnoki rongsen, nubo, shisatsü aser sarasadem den tako marok lemsatepoko, nenok ajak dang kanga pelaba lemsateper.

Talisa Longsa Senso Telongjem Dimapur, Longsa Senso Tetsür Telongjem Dimapur, Lemtur Kidong Dimapur, Longsa Village Council, Lengrijan Village council Dimapur, Food & Civil Supplies Nagaland, Apollo Multispeciality Hospital Kolkata, Nagaland House Kolkata, Naga Christian Fellowship Kolkata, Dimapur Ao Baptist Arogo aser DABAYM Sümedem Fellowship. Nenok mapa tajung yari, ozüi kecha meyipba magutsutet saka teyanglur Tsüngremi maneni moajang ta ozü sarasadem.

Temeim Kinungsü, jala-jabaso, semchirtem, Anükapangtem aser kinungertem.

Kawimaningsiliu-i Miss Nagaland 2021 kokogo



Kohima, Luchii/December 21, 2021 (TYO): Regional Centre of Excellence for Music & Performing Arts (RCEMPA) nung Hombarnü (20.12.2021) Miss Nagaland 2021 sentong agia liasü. Iba beauty pageant tetoktepba nung Peren district nungi Kawimaningsiliu-i 'Miss Nagaland 2021' takok korang angu, ta sangdong ajanga

metetdaksü.

Takok korang den külemi lai 'Queen of Hearts' sub-title angu. Iba sentong ya Beauty & Aesthetics Society of Nagaland (BASN) ajanga ayongzüka aser BASN tenteter küm 30 ajungba anogomung nung iba sentong agia liasü.

Miss Nagaland 2021 tetoktepba nung Zunheboto nungi Lika Chophy aser

Dimapur nungi Lovi Awomi nati 1st aser 2nd runners-up jenjang angu.

Miss Nagaland 2021 takok angur Kawimaningsiliu nem senpet lakh 1 agütsüba den külemi lai Task Force for Music & Arts (TaFMA) indang brand ambassador inyaksü aser küm ka atema la nem senotsü teyari agütsütsü, ta kasa sangdong nung shia lir.

United Soyim Club tenteter küm 50 abensaago



Mokokchung, 21 Dec (TYO): United Soyim Club tenzükür küm tenem (50) ajungba hon jubilee sentong 21st Dec nü "Alakteta Tongtetang" omen dak rangloker USC Badminton Court Ungma nung meraket keta mungogo.

Iba sentong nung nung tongti o jembir Labour Commissioner Office Kohima, Project Officer, Wb. T. Chubayanger-i omen nung ajemdaker jembidang, pei sasa pei jenjang/tashi mait bushitsüla, pei sempet

metettsüla, nükjidong mamatoki takok asoshi maneni merangtsüla, pei sempetji meyushia tanen makai bener aotsüla aser tangar dang nungi alakteta takok angutsüba nung ya bendanga agütsüba aika sentaka lir, ta ashi.

Paisa alakteta tongtettsü asoshi nisung ka dak lidaktsünüba kar ashidang, shisadangba, tangar o angaba, angazükba/angazükshiba, angatetba, metendaktsüba, asüngdangyaba, tenoka angaba/temulung agütsüba, tangar den

semloka litetba, jembishinü/yimyaliru ajungba, tangari asenok dak mulung lemtetba, kati ka nungitpepa inyakba (team work), mapang shitak amshitetba, aser ajak dang alia teyanglur Tsüngrem metetba item jaklatem amangtsü ajungshia liasü.

Aonung sentong nung Nagaland Legislative Speaker Assembly Speaker, Wb. Sharingain Longkumer tongti tejaoker liasü aser pai tayongzüka o tulu bener arua tesentepertem ayongzüka.

Office of the Mokokchung Town Khensa Senso Telongjem

TENÜNGSANG AGÜTSÜR

1. Mr. T. Supongmar Longchar, Promoted to Director, Department of Agriculture, Government of Nagaland.
2. Mr. Moasunep Walling, Promoted to Inspector Task Force, Mokokchung Municipal Council.

2021 küm tsüngda tenai temaba menden tajung ajangzüka atema Mokokchung Town Khensa Senso Telongjem (MTKST) ajanga tenüngsang agütsüa iba sabang ajanga lemsateper. Tsüngremi tena taküm aser wadang maneni moajangma.

Sd/-
Wapangtemjen
President, MTKST

Sd/-
Medemmayang
Secretary, MTKST



Mokokchung, Luchii/December 21, 2021: 'Mokokchung Town Best Maintained Ward Award 2021' indang sempet agütsüba sentong ya Mongolbarnü MMC Conference Hall nung agia liasü. Aongza Ward, Alempang Ward aser Salangtem Ward temi mezüngbuba, tanabuba aser tasembuba jenjang angu. Iba sentong temer sülen, takok angurtem den Mokokchung Town indang ward 18 nungi teshimtet nübu, MMC aser District Administration ketdangsürtem külemi tangokba noksa ka yangi angur.

Wicket Wizards-i 2buba Trojans Trophy kokogo



Zunheboto, Luchii/December 21, 2021 (TYO): 2buba Trojans Trophy 2021 final nung Wicket Wizards Cricket Club-i De-Legends CC tsükdaksü. Iba asayamung final ya Hombarnü (20.12.2021) local ground, Zunheboto nung asaya liasü, ta sangdong ajanga metetdaksü.

Toss koka Wicket Wizards-i batting shim aser latetja aliba over 20 nung parnoki De-Legends atema target 152 yutsü. Mezüng innings nung Wicket Wizards captain, Vinoka I Sumi-i run 35 yanglutet aser pa den külem asayar Kanato Aye-i run 29 yanglua liasü aser tena sentepa run 59 (opening partnership) bendenloksü.

Tanabuba innings nung, Wizards puri yutsüba alizüng tongtetsü asoshi De-Legends CC-i meranga asaya tenzük, saka run 127 nung parnok ajak our out süadok.

Takok angur team Wicket Wizards nem senpet 50,000 aser trophy agütsü aser runners up team - De-Legends CC nem senpet 30,000 agütsüogo. Iba asayamung tenzük nungi tatem tashi lenla ajunga nung junga shilem agiba atema, De-Legends indang Hutoho Kiba nem 'man of the tournament' agütsü.

Hutoho dak alaka, Wicket Wizards club indang Bablu Qureshi-i 'best bowler award' angü. De-Legends club indang Nihuto nem 'best fielder' award agütsü aser Wicket Wizards club nungi Vinoka I Sumi-i 'man of the final match' award angü.

Iba asayamung shibangba sentong nung, tournament Convenor, Kinito Jimo-i iba asayamung atema 1st aser 2nd cash prize sponsors, Mr&Mrs. Arto Jakhalu, Dr&Mrs. Bohovi Choppy; Individual award sponsors, Rokato (man of the

final match), V/president NCA Herato Sükhulu (best bowler award aser organiser nem kits tenla agütsüba atema) nunger dang pelaba metetdaksü.

Iba asayamung takok ngua agütsü asoshi tenla balala agütsüba atema Jimo-isa NDPP, president Khehoshe Yephthomi, Khuheshe Yephthomi, ZDCA aser tanga department ajak den temulunger balala dang pelaba shisem.

Maneni, President Trojans XX, Hekato Yephtho-i, sangküm asayamung nungibo senpet timba agütsüta ta telok dang nangzuka liasü.

Oting lendong nung tai makar taküm samartem nem akhüm agütsüta aser parnok kibong/adianu tem den asükhu lemsateptsü tebilemba nung iba asayamung anogo asem tashi thinena liasü aser December 11 nungi tenzükshi aser December 20, 2021 nü tembanga liasü, ta kasa sangdong nung shia lir.

Zverev nem 'German Sportsman Of The Year' naroküm agütsü

Luchii/December 21, 2021 (Agencies): Tan season nung takok ngua asaya aruba sülen, Hombarnü Alexander Zverev nem 'German Sportsman of the Year' naroküm agütsü.

Tennis wadang nung ajemoker külen nungi Zverev-i tan season tajungtiba asaya liasü. Tan season nung Zverev-i 59-15 record ajangzuktet, kong Tokyo Olympics tebur kija asaya nung pa gold medal angü aser ATP Finals koka liasü.

ATP Finals putiotsü nung ATP Rankings temaba jenjang nung alir asayar ana madak semi-final aser final (ATP Finals) nung takok angur

Germany nunger rongnung Zverev asayar pezübuba aküm. Iba asayamung (ATP Finals) semi-final nung arishi küm 24 tain Zverev-i World No.1, Novak Djokovic tsükdaksü aser takok marok angutsü asoshi final nung pai World No.2 Daniil Medvedev tsükdakja liasü.

2021 ATP Tour nunga Zverev-i anir Germany team shilem agia liasü. Madrid aser Cincinnati nung pai ATP Masters 1000 pezübuba aser pungobuba title densema ATP Tour nung pai title trokbuba ajangzuktet. Zverev-isa Acapulco aser Vienna asayamung koka liasü.

Senior National Muaythai C'ship nung Nagaland-i medal 8 angu



Dimapur, Luchii/December 21, 2021 (TYO): Tesüiba anogo ishika tejakdang Imphal, Manipur nung December 16 nungi tenzuka December 19, 2021 tashi ayongba Senior National Muaythai Championship nung Nagaland Muaythai Association indang boxer 11 aser ketdangsür 5 densema züngsem 16 agi shilem agiogo, ta sangdong ajanga metetdaksü.

Iba championship nung Nagaland Team-i gold medal 3, silver medal 3 aser bronze medal 2 densema medal 8 angu. Gold Medal angurtemji Gihuka Assumi (17- 23 yrs), Manyum Konyak - Bantam Weight (23-40yrs) aser Aboto - Feather

Weight (23-40yrs) asütsü. T. Chingjei Konyak - Fly Weight (17-23 yrs), Botovi Zhimo - Light Fly Weight (23- 40 yrs) aser Chingom Konyak - Fly Weight (23- 40 yrs) nungeri silver medal angü.

Bronze Medal angur rongnung Asuvi Zhimomi - Light Fly Weight (17- 23 yrs) aser Huthuka Chishi Bantam Weight (17-23 yrs) na dena lir.

Maneni, ketdangsür (officials) temji Kinnito Chishi - Team Manager, Hemavi Ayemi - Team Coach, Pangmei - Asst. Coach, Imlitangit Ao - Referee & Judges aser Takameren - Jury liasü, ta kasa sangdong nung shia lir.

12th Nat. Taekwondo C'ship nung Hollotoli School-i gold medal ana angu



Dimapur, Luchii/December 21, 2021 (TYO): 12buba National Taekwondo Championship asayamung nung, Hollotoli School nung class IX nung azünger tetsür anati gold medal nguogo. Iba championship nung Likuta P Tissica (under 41 kg) aser Miss. Likupu Swu (under 44 kg) nati pei pei tata category nung gold medal ngua School aser State nem khonang bener arutsüogo, ta sangdong ajanga metetdaksü.

Kasa Championship nung, team coach Deepak Kumar Prasad-i Poomse (under age 40 category) nung gold medal angü. Iba Championship ya Maharana Pratap Sports College, Raipur Dehradun nung December 19 aser 20, 2021 nü asaya liasü. India kübok State 16 nungi nisung 800 agi iba Championship nung shilem agiogo, ta kasa sangdong nung shia lir.

Lakhimpur Kheri ken o nung...

Parliament nung opposition party temi iba ken o sensaksemtsü atema akhangba mapang ka nung Rahul Gandhi-i, Centre-i iba ken o sensak mesemner ta ashi.

"Parnoki onok nem o jembitsü temelaba magütsür, ibayongji house minpronger. Iba tatalokba nung parnok minister densema lir. Anungji sensaksemtsü melatsüla, saka parnoki sensak mesemner," ta Gandhi-i December 15 nü

osangbenertem dang ashi.

Parliament winter session tenzükba sülen opposition party temi iba tatalokba dak sendakba nung Centre nongshia arudar aser parnoki Union minister Ajay Kumar Mishra mapa nungi agintsü akhanger. Parnokisa SIT indang report dak sendakba nung sensakasemtsü akhanger.

Mongolbarnü Congress MP temi Rajya Sabha nung suspension of business notice

(Tapak 7 nungi...)

aser Lok Sabha nung adjournment motion notice benokogo.

Lakhimpur Kheri nung October 3 nü aluyimer pezü densema nisung ti tepsetogo. Iba ken o nung Union minister Ajay Kumar Mishra'er jabaso Ashish aija lir aser pa maneni tepuokdak yua lir.

Mishra-i, par jabaso-i aibelena mali ta aiben shia arudar aser parnok ket nung kuli dena lir ta shiogo.



Qatar ajanga ayongba FIFA Arab Cup 2021 final ya Al Bayt Stadium kübok Algeria aser Tunisia tsüngda asaya liasü. Honibarnü iba final asaya nung Algeria-i Tunisia madak goal 2-0 agi takok anguba sülen, parade sentong ka nung Algeria National Football team züngsem temi fans den külemi benjungtepba noksa nung angur.

BILEMDANGANG

"Nai kechi inyakteter aji meranga inyakang."